

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 249850 24 St
Zenica, 31.07.2025. godine

Općinski sud u Zenici, sutkinja Marina Šapina, u stečajnom postupku nad društvom Proizvodno prometno uslužno društvo „DERYA“ Zenica d.o.o., ul. Londža broj 128, Zenica, odlučujući o prijedlogu privremene stečajne upraviteljice Nure Soldin iz Zenice, nakon ročišta održanog dana 23.04.2025. godine, u prisustvu privremene stečajne upraviteljice i zastupnika po zakonu predlagatelja Coskun Deniz, direktor društva, van ročišta dana 31.07.2025.god. donio je sljedeće:

R J E Š E N J E

Pozivaju se povjerioci i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbijedenje troškova stečajnog postupka u iznosu od 5.000,00 KM, na depozitni račun ovog suda broj: 134-010-0000044837 otvoren kod ASA Banke d. d. Sarajevo, te da po izvršenoj uplati predujma sudu dostave uplatnicu, kao dokaz da je uplata izvršena.

Ukoliko u ostavljenom roku povjerioci i zainteresirana lica ne predlože otvaranje stečajnog postupka i ne uplate predujam sud će otvoriti stečajni postupak i odmah zaključiti stečajni postupak nad društvom Proizvodno prometno uslužno društvo „DERYA“ Zenica d.o.o., ul. Londža broj 128, Zenica, MBS: 43-01-0193-14 (stari broj 1-9035).

O b r a z l o ž e n j e

Prijedlogom od 21.08.2024.godine, predlagatelja Proizvodno prometno uslužno društvo „DERYA“ Zenica d.o.o., ul. Londža broj 128, Zenica, zastupan zastupniku po zakonu Coskun Deniz, direktor društva, pokrenut je stečajni postupak nad navedenim društvom.

Rješenjem ovoga suda br. 43 0 St 249850 24 St od 07.02.2025. godine, pokrenut je prethodni postupak radi utvrđivanja uslova za otvaranje stečajnog postupka nad imovinom stečajnog dužnika Proizvodno prometno uslužno društvo „DERYA“ Zenica d.o.o., ul. Londža broj 128, Zenica, MBS: 43-01-0193-14 (stari broj 1-9035) i za privremenog stečajnog upravnika imenovana je Nura Soldin iz Zenice, Talića brdo 1A.

Na ročištu za ispitivanje uvjeta za otvaranje stečaja održanom dana 23.04.2025. godine, privremena stečajna upraviteljica je izjavila da ostaje kod navoda iz izvještaja dostavljenog sudu dana 10.03.2025. godine. Navodi, da je urađen bilans stanja na dan 31.12.2024. godine, u kojem je evidentirano da stalna sredstva iznose 0 zalihe robe 47.453,000 KM, novčana sredstva 3.304,00 KM, potraživanje od kupaca 77.458,00 KM, što ukupno čini aktivu u iznosu od 128.215,00 KM. Pasivu čine kapital od 2.000,00 KM, akumulirani gubitak minus 2.634,00 KM, dobavljači u zemlji 122.169,00 KM, i ostale obaveze 6.680,00 KM, ukupan iznos pasive 128.215,00 KM. Napravljen je pregled i bilansa stanja za 2023. godinu, da bi se utvrdilo da su zalihe sa 116.328,00 KM na dan 31.12.2023. godine pale na 47.453,00 KM, iz razloga što je prilikom kontrole porezne uprave predloženo od strane porezne uprave na kojem sam sastanku je prisustvovala i privremena stečajna upraviteljica, da se napravi Odluka o isplati iz dobiti u iznosu od 68.874,57 KM u korist osnivača

društva ali u robi a ne u novčanim sredstvima. To je bio prijedlog da bi se smanjile zalihe robe i da bi porezna uprava napravila zapisnik na ostatak od 47.453,00 KM, na koji je onda utvrdila dodatne obaveze u ukupnom iznosu od 12.450,68 KM. Također je Uprava za indirektno oporezivanje (UIO RC Sarajevo) prijavila potraživanja od 2.743,00 KM, pa se za ove dvije stavke uvećavaju obaveze stečajnog dužnika. Kontrola porezne uprave je izvršena u mjesecu julu 2024. godine i nakon izvršene kontrole je pozvan direktor da se očituje o ovim zalihama robe, a također je prisustvovala privremena stečajna upraviteljica sastanku kao knjigovođa. Naprijed navedeno je bilo knjigovodstveno stanje, potom je organizovan popis imovine i obaveza sa direktorom dana 05.03.2025. godine, ali pošto je sjedište društva bilo na zakupljenom prostoru na adresi Londža 128 Zenica i pošto je taj prostor odjavljen davno, nije bilo moguće napraviti popis imovine. Radi navedenog je tražila od bivšeg knjigovođe bruto bilans koji joj je dostavljen i koji se odnosi na dan 31.12.2023. godine, u kojem je konstatovano da iako su sva stalna sredstva amortizovana 100%, da su se knjigovodstveno vodile jedna fiskalna kasa, jedno teretno vozilo kombi i kancelarijski namještaj koji se sastojao od dva stola i tri stolice. U izvještaju je priložen popis od 05.03.2025. godine, u kojem je direktor dao obrazloženje da je kombi prodat 2011. godine, kancelarijski namještaj je dat u kompenzaciju za dug, a jedna fiskalna kasa se nalazi kod kuće direktora, ali pošto se radi o staroj fiskalnoj kasi, koja je tehnički zastarjela i time neupotrebljiva njena tržišna vrijednost je 0. Napravljena je analiza potraživanja od kupaca, za koje je direktor rekao da su stara oko 10 godina, dobila je od bivšeg knjigovođe Analitičku karticu potraživanja od kupaca na dan 31.12.2020. godine i na dan, 31.12.2023. godine, i poređenje ove dvije analitičke kartice može se konstatovati da se radi o istim kupcima i istim iznosima, jedina razlika je u stavci broj 1, naziv kupca TWINS d.o.o. Sarajevo iz kojeg se vidi da je 31.12.2020. godine potraživanje iznosilo 76.166,44 KM, a 31.12.2023. godine iznosilo 47.165,65 KM, što znači da je razlika između ova dva iznosa naplaćeni dio potraživanja što je prikazano u tabeli 1 izvještaja o radu. Iz tabele 1 proizilazi da su ova potraživanja stara najmanje 5 godina, a pošto je zastarni rok 3 godine eventualna tužba bi bila odbačena radi zastare. Novčana sredstva u iznosu od 3.304,00 KM knjigovodstveno u stvarnosti iznose 0 KM, jer su utrošena za tekuće obaveze i pokretanje stečaja. Četvrta stavka od imovine su tepisi, koja nakon pomenute odluke iznose 47.453,00 KM, a stvarno stanje je 0 KM. Direktor je izjavio da se radi o tepisima koji su bili oštećeni za vrijeme poplava 2014. godine, koji se nisu mogli prodavati te su završili u otpadu. Zaključak je da je knjigovodstvena vrijednost imovine iznosila 128.215,00 KM, a stvarna vrijednost je 0 KM. Ukupne obaveze na dan 31.12.2024. godine iznose 128.849,00 KM, od čega obaveze za dobavljače 122.169,00 KM, obaveze za plaće i doprinose za plaće 4.727,00 KM, obaveze za porez na dobit u iznosu 389,00 KM i obaveze za ostale poreze 1.564,00 KM. Dodatno utvrđene obaveze od strane porezne uprave FBIH KPU Zenica je po izvršenoj kontroli u periodu od 08.07.2019. godine do 08.07.2024. godine, utvrdila dodatne obaveze u ukupnom iznosu od 12.450,68 KM. UIO RC Sarajevo je prijavila potraživanja u prethodnom postupku od 2.743,00 KM tako da se ove dvije stavke dodavaju ukupnim obavezama od 128.849,00 KM. Na kraju zaključak i mišljenje je da prema čl. 61 stav 2. postoji razlog za otvaranje stečajnog postupka jer je utvrđena platežna nesposobnost društva. Platežna nesposobnost je nastupila blokadom transakcijskog računa u Intes Sanpaolo banci, koja je u trenutku pisanja izvještaja trajala duže od 60 dana, a što pokazuje izvještaj o blokiranim računima Centralne banke BiH na dan 01.03.2024. godine, kada je na strani 713/4200 prikazana DERYI d.o.o. Zenica. Pošto je račun u Sanpaolo banci blokiran duže od 60 dana može se konstatovati da organ ovlašten za zastupanje društva nije podnio prijedlog za pokretanje stečajnog postupka u roku od 60 dana od dana nastupanja platežne nesposobnosti a prema čl. 6. stav 5. Zakona o stečaju.

Navodi da prema čl. 63. stav 2. stečajni dužnik nema imovine iz kojeg bi se mogli namiriti troškovi stečajnog postupka a prema čl. 63. stav 3. poslovanje stečajnog dužnika u zatečenom ekonomsko finansijskom stanju ne može se nastaviti, te predlaže da sud uputi poziv povjericima i zainteresiranim licima da predlože otvaranje stečajnog postupka i uplate predujam u iznosu od 5.000,00 KM, te u koliko u ostavljenom roku ne uplate predujam, da sud donese rješenje o

otvaranju i zaključenju stečajnog postupka nad navedenim društvom a po pravomoćnosti istog dostavi rješenje registru suda radi brisanja društva iz sudskog registra.

U dopuni izvještaja od 07.05.2025.god., privremena stečajna upraviteljica navodi da su potraživanja od kupaca navedenih u Tabeli koja je dio dopune izvještaja zastarila.

Zastupnik po zakonu predlagatelja izjavljuje da zalihe robe koje su upisane u knjigovodstvo vrijednost i 116.328,00 KM na dan 31.12.2023. godine, predstavljaju samo fiktivni iznos jer je roba koju je društvo skladištilo na adresi Prve Zeničke brigade broj 48, Zenica, uništena u poplavama ili je ukradena, ali direktor izjavljuje da za navedeno nema sačinjenog zapisnika od strane nadležnih organa. Dalje izjavljuje, da su prema njegovom saznanju sva potraživanja od kupaca starija od 7 do 8 godina. Te izjavljuje da će pokušati da pronađe fakture za navedena potraživanja. Izjavljuje da nema primjedbi i pitanja na izvještaj privremene stečajne, te je suglasan sa prijedlogom privremene stečajne upraviteljice.

Kako stečajni dužnik ima obaveze, a nema imovine, pa ni za troškove stečajnog postupka, to je sud primjenom odredbe člana 102 st. 7. Zakona o stečaju („Službene novine F BiH”, broj: 53/21) pozvao povjerioci i zainteresirana lica da predlože otvaranje stečajnog postupka i uplate predujam za obezbijedenje troškova stečajnog postupka. Visina troškova srazmjerno je određena visini troškova koji se očekuju, a koji su potrebni za otvaranje i vođenje stečajnog postupku, a koje je predložio privremeni stečajni upravitelj.

Slijedom navedenog odlučeno je kao u izreci ovog rješenja primjenom odredbe čl. 102 st. 7 Zakona o stečaju (Sl. novine F BiH br. 53/21), a ovim rješenjem povjerioci i zainteresirana lica su upozorena na posljedice propuštanja postupanja po pozivu ovog suda, propisane čl. 102 st. 8 Zakona o stečaju.

POUKA O PRAVNOM LIJEKU:
Protiv ovog rješenja nije
dozvoljena žalba.

Sutkinja:
Marina Šapina, v.r.